

Na osnovu čl. 4.2 i 4.8, Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), i člana 7. Odluke o snabdijevanju kvalificiranih kupaca električnom energijom u Brčko Distriktu Bosne i Hercegovine ("Službeni glasnik BiH", broj 89/11), rješavajući po zahtjevu Javnog preduzeća za komunalne djelatnosti "Komunalno Brčko" d.o.o., Brčko Distrikt BiH, broj: 02.01-16685/11 od 4. novembra 2011. godine, na sjednici Državne regulatorne komisije za električnu energiju održanoj 22. decembra 2011. godine, donijeta je

ODLUKA

O ODREĐIVANJU TROŠKA ELEKTRIČNE ENERGIJE DODIJELJENOG SNABDJEVAČA U BRČKO DISTRIKTU BOSNE I HERCEGOVINE

Član 1.

(Predmet)

Ovom odlukom utvrđuje se trošak električne energije koji dodijeljeni snabdjevač koristi za određivanje cijena po kojima isporučuje električnu energiju kvalificiranim kupcima u Brčko Distriktu BiH.

Član 2.

(Prosječna nabavna cijena električne energije)

Prosječna nabavna cijena električne energije za kategoriju potrošnje domaćinstva (p_d) u Brčko Distriktu BiH iznosi 6,4917 fening/kWh.

Član 3.

(Koeficijent korekcije cijene)

Koeficijent korekcije cijene električne energije (K) koji odražava uvjete na tržištu električne energije u BiH iznosi 1,05.

Član 4.

(Trošak nabavke električne energije za kvalificirane kupce)

Trošak nabavke električne energije (p_{kk}) se bazira na cijeni iz člana 2. ove odluke i koeficijenta korekcije cijene električne energije iz člana 3. ove odluke i iznosi 6,8163 fening/kWh.

Član 5.

(Obaveza objave cijena)

- (1) Javno preduzeće za komunalne djelatnosti "Komunalno Brčko" d.o.o., Brčko Distrikt BiH, kao korisnik privremene licence za obavljanje djelatnosti distribucije i snabdijevanja električnom energijom, a u funkciji dodijeljenog snabdjevača, dužno je na odgovarajući način objaviti cijene po kojoj kao dodijeljeni snabdjevač isporučuje električnu energiju kvalificiranim kupcima i relevantne odredbe ove odluke, te ih učiniti dostupnim svim kupcima na području Brčko Distrikta BiH.
- (2) Rok za objavljivanje cijena iz stava 1. ovog člana je 16. januar 2012. godine.
- (3) Cijene iz stava 1. ovog člana primjenjuju se od 1. aprila 2012. godine do kada će se, u skladu sa odlukom DERK-a o privremenim tarifnim stavovima za nekvalificirane kupce električne energije u Brčko Distriktu Bosne i Hercegovine ("Službeni glasnik BiH" broj 10/11), primjenjivati važeći tarifni stavovi za kupce iz odgovarajuće kategorije potrošnje.

Član 6.
(Završne odredbe)

- (1) Ova odluka stupa na snagu danom donošenja i bit će objavljena u “Službenom glasniku BiH” i službenom glasilu Brčko Distrikta Bosne i Hercegovine.
- (2) Odluka sa obrazloženjem dostavit će se podnosiocu zahtjeva i objaviti na internet stranici DERK-a u roku od 30 dana od dana donošenja.

Obrazloženje

U skladu sa *Odlukom o snabdijevanju kvalificiranih kupaca električnom energijom u Brčko Distriktu Bosne i Hercegovine* (“Službeni glasnik BiH” broj 89/11 - u daljem tekstu: Odluka o snabdijevanju) svi kvalificirani kupci u Brčko Distriktu BiH koji u roku od 90 dana, počev od 1. januara 2012. godine, ne izaberu svog snabdjevača, nastavit će se snabdijevati od dodijeljenog snabdjevača.

Takođe, imajući u vidu odredbe *Metodologije za izradu tarifa za usluge distribucije električne energije u Brčko Distriktu Bosne i Hercegovine* (“Službeni glasnik BiH”, broj 89/11 – u daljem tekstu Metodologija), pristup treće strane i usluga distribucije električne energije su obezbijedeni svim kvalificiranim i nekvalificiranim kupcima, kao i drugim korisnicima distributivnog sistema, pod istim uvjetima i bez diskriminacije.

Na osnovu Odluke o snabdijevanju dodijeljeni snabdjevač u Brčko Distriktu BiH je Javno preduzeće za komunalne djelatnosti “Komunalno Brčko” d.o.o (u daljem tekstu: Kompanija).

Cijena po kojoj Kompanija, u svojstvu dodijeljenog snabdjevača, isporučuje električnu energiju kvalifikovanim kupcima obuhvata troškove mrežarina, pomoćnih usluga, snabdijevanja, električne energije i svih drugih troškova koji se odnose na proces snabdijevanja.

Trošak električne energije se određuje na osnovu prosječne nabavne cijene električne energije za kategoriju potrošnje domaćinstva u Brčko Distriktu BiH i koeficijenta korekcije cijene električne energije koji odražava uvjete (okolnosti) na tržištu električne energije u BiH.

Prosječna cijena nabavke električne energije za kategoriju potrošnje domaćinstva u Brčko Distriktu BiH iznosi 6,4917 feninga/kWh.

Utvrđeni koeficijent $K=1,05$, kao koeficijent korekcije cijene električne energije koji odražava uvjete na tržištu električne energije u Bosni i Hercegovini, je cjenovni signal kvalificiranim kupcima na području Brčko Distrikta BiH i, u kombinaciji sa garantiranim pristupom distributivnoj mreži, predstavlja stimulans za napuštanje reguliranog načina snabdijevanja električnom energijom i izlazak na tržište električne energije.

Kompanija, u funkciji dodijeljenog snabdjevača, određuje cijene po kojima isporučuje električnu energiju kvalificiranim kupcima u Brčko Distriktu BiH. Ove cijene moraju biti određene na transparentan način, javno objavljene i dostupne svim zainteresiranim subjektima.

U skladu sa Odlukom o snabdijevanju, u slučaju da cijene po kojima dodijeljeni snabdjevač isporučuje električnu energiju kvalifikovanim kupcima nisu određene na transparentan način ili predstavljaju oblik netržišnog ponašanja, DERK ima pravo osporiti tako utvrđene cijene.

Takođe, u cilju sprječavanja nedozvoljenih ponašanja, zloupotrebe pozicije na tržištu odnosno ispoljavanja tržišne moći od strane učesnika, nadzor efikasnosti funkcioniranja tržišta električne energije u Brčko Distriktu BiH će vršiti DERK.

Uvođenje konkurencije na tržištu električne energije i liberalizacija tog istog tržišta zahtijevaju provođenje velikih strukturalnih i regulatornih reformi te pripremu odgovarajuće regulative. Ova odluka je dio ove regulatorne reforme i predstavlja nastavak pristupa realizaciji sveukupnih obaveza Bosne i Hercegovine prema Ugovoru o uspostavi Energetske zajednice (“Službeni glasnik BiH – Međunarodni ugovori” broj 9/06).

Na osnovu naprijed izloženih stanovišta Komisije, u okvirima njenih diskrecionih prava da potvrdi reprezentativnost i opravdanost svih podnijetih podataka i tvrdnji, i da procjenjuje stepen vjerovatnoće ostvarenja svih prognoziranih troškova i veličina, te koristeći proširena ovlaštenja utvrđena Zakonom o prijenosu i Zakonom o električnoj energiji (“Službeni glasnik BD BiH”, br. 36/04, 28/07 i 61/10) da uređuje i pitanja regulisanja snabdijevanja električnom energijom kupaca na području Brčko Distrikta BiH, Komisija donosi odluku kao u dispozitivu.

DERK će kontinuirano pratiti efekte primjene ove odluke zadržavajući pravo podešavanja kada ocijeni da je to potrebno.

U skladu sa članom 9.2 *Zakona o prijenosu, regulatoru i operatoru sistema električne energije u Bosni i Hercegovini*, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 04-28-5-334-19/11

Predsjedavajući Komisije

22. decembra 2011. godine

Tuzla

Nikola Pejić